

Datum: 03.06. 2025.

Broj: 02-06-1036

TI BiH apeluje na Skupštinu Brčko distrikta: Omogućiti javnu raspravu o novom Zakonu o slobodi pristupa informacijama

Banja Luka, 03. Jun 2025. godine: Transparency International BiH zatražio je od Skupštine Brčko distrikta BiH da uputi na javnu raspravu nacrt Zakona o slobodi pristupa informacijama kako bi se unaprijedile odredbe, zaštitila prava građana i omogućilo uključivanje šire zainteresovane javnosti.

Sadržaj ovog zakona direktno utiče na prava građana da pristupe informacijama od javnog značaja, zatim na rad novinara i organizacija civilnog društva koje kontrolišu rad vlasti, a proteklih dana imali smo više reakcija i upozorenja da će predloženo rješenje dodatno omogućiti vlastima da kriju informacije od javnog interesa.

Ovaj propis tiče se svih građana kojima je to jedini mehanizam za dobijanje informacija pod kontrolom javnih organa. Nažalost, predloženim rješenjem ukida se mogućnost žalbe na odluku organa od kojeg se traže informacije, tako da će oni koji budu htjeli zaštititi svoja prava morati voditi sudske sporove koji će iziskivati dodatne troškove za zastupanje advokata, sudske takse i sl. pa je velika i vjerovatnoća da će dio njih u startu odustati.

Objavljivanje nacrta ovog Zakona izazvalo je negativne reakcije u javnosti i medijima zbog spornih odredbi koje ograničavaju pravo žalbe, propisuju prekršajne odredbe koje neće imati efekta u praksi, zanemaruju važeće procedure upravnog postupka, te potencijalno onemogućavaju efikasan nadzor nad postupanjem javnih organa.

Upravo zbog značaja i potencijalnog uticaja Zakona na građane, novinare i aktiviste, neophodno je da proces njegovog usvajanja bude otvoren, inkluzivan i transparentan, te da svi zainteresovani imaju mogućnost da iznesu svoje prijedloge i sugestije.

TI BiH smatra da bi upućivanjem zakona u javnu raspravu vlast Brčko distrikta BiH poslala važnu poruku da uvažava principe demokratskog odlučivanja i poštuje pravo građana na učešće u donošenju odluka i oblikovanju javnih politika.